

四庫全書

史部

欽定四庫全書

史部

欽定續通志卷二百

三十七至  
四十

通雅司副使臣施朝幹覆勘

總校官原任侍講臣王燕緒

欽定四庫全書

欽定續通志卷一百三十七

列傳

唐

三十七

郭虔瓘

郭知運

英傑  
英傑

王君奭

張守珪

獻誠  
獻甫

獻恭

王忠嗣

牛仙客

哥舒翰

曜

高仙芝

封常清

郭虔瓘齊州歷城人開元初錄軍閥累遷右驍衛將軍兼北庭都護金山道副大總管明年突厥默啜子同俄特勒圍北庭虔瓘飭壘自守同俄單騎馳城下勇士狙道左突斬之敵亡酋長相率而降請悉軍中資贖同俄死聞已斬舉軍慟哭去虔瓘以功授冠軍大將軍安西副大都護封潞國公

虔瓘始封太原郡公進潞國

請募關中兵萬人

擊餘寇有詔令募士所過給公乘熟食將作大匠韋湊上言漢徙豪族以實關中今畿輔戶口逋耗異時邊陲

有警丁壯悉行不宜更募驍勇以空京甸資荒服萬人  
所過遞馱熟糴亘六千里州縣安所供億秦隴以西多  
沙磧少居人若何而濟縱有克獲其補幾何僅稽天誅  
無乃甚損不省既而虔瓘果不見敵還遷涼州刺史河  
西節度大使進右威衛大將軍四年奏家奴八人有戰  
功求為游擊將軍宰相劾其恃功亂綱紀不可聽罷之  
陝王為安西都護詔虔瓘為副虔瓘與安撫招慰十姓  
可汗使阿史那獻數持異交訴諸朝玄宗遣左衛中郎

將王惠齋詔書諭解

杜暹傳度瓘與阿史那獻劉暹度等不協詔暹往按應是一時事

度瓘奉詔久之卒軍中以張孝嵩為安西副都護孝嵩

偉姿貌及進士第而慷慨好兵在安西勸田訓士府庫

盈饒徙太原尹卒以黃門侍郎杜暹代

新舊書杜暹傳俱稱暹代張孝

嵩為安西都護而舊書度瓘傳乃作張嵩按通鑑開元十年北庭節度使張嵩擊吐蕃大破之新舊書不載其事而張孝嵩為安西都護亦正在其時疑本是一人而或以為嵩或以為孝嵩或以為安西或以為北庭則傳

聞異辭耳

郭知運字逢時瓜州晉昌人

舊書作長樂人

長七尺猿臂虎口

以格鬪功累補秦州三度府果毅從郭虔瓘破突厥有功加右驍衛將軍封介休縣公吐蕃將坌達延乞力徐寇渭源盜牧馬詔知運與薛訥王駿等相犄角敗之進階冠軍大將軍兼臨洮軍使封太原郡公賜賚萬計徙隴右諸軍節度大使鄯州都督突厥降戶阿悉爛跌跌思泰率衆叛執單于都護張知運詔以朔方兵追擊至黑山呼延谷敗之敵棄仗走取副都護還詔知運兼隴右經畧使營柳城開元五年大破吐蕃獻俘京師明年

復出將輕兵丙夜至九曲獲精甲名馬犛牛甚衆既獻  
獲詔分賜文武五品以上清官及朝集使三品者進鴻  
臚卿攝御史中丞六州胡康待賓反率王晁討平之拜  
左武衛大將軍授一子官賜金帛九年卒於軍年五十  
五贈涼州都督知運屯西方邊人畏憚與王君奭功名  
畧等時號王郭帝詔中書令張說紀其功於墓碑上元  
中配饗太公廟永泰初謚曰威子英傑英乂

英傑字孟武為左衛將軍幽州副總管開元二十三年



長史薛楚玉遣英傑與裨將吳克勤烏知義羅守忠帥  
萬騎及奚衆討契丹屯榆關契丹酋長可突于拒戰都  
山下奚衆貳官軍不利知義守忠引麾下遁去英傑克  
勤力戰死其下尚六千人殊死戰敵示以英傑首終不  
屈師遂燔

英乂字元武以武勇有名河隴間累遷諸衛員外將軍  
哥舒翰見之曰是當代吾節制者祿山亂拜秦州都督  
隴右採訪使賊將高嵩擁兵入汧隴英乂偽勞之且具

饗伏兵發盡虜其衆至德二載加隴右節度使召還改  
羽林軍大將軍掌衛兵以喪去職史思明陷洛陽謀掠  
陳蔡詔英乂統淮南節度兵賊叩陝號又改陝西節度  
潼關防禦使進御史大夫兼神策軍節度使代宗即位  
以檢校戶部尚書兼大夫雍王率諸將討賊洛陽留英  
乂殿於陝東都平權知留守英乂無檢御才縱麾下與  
朔方回紇大掠都城及鄭汝環千里無居人召拜尚書  
右僕射封定襄郡王日驕蹇為侈汰陰事宰相元載以

久其權嚴武卒拜劍南節度使自以有內主故肆志無  
所憚初玄宗在蜀時舊宮為道士祠冶金作帝像盡繪  
乘輿侍衛每尹至先拜祠後視事英人愛其地勝選輒  
壞繪像自居之衆始不平又教女伎乘驢擊毬鈿鞍寶  
勒及他服用日費數萬未嘗問民間事為政苛暴道路  
以目怨崔旰旰後賜名寧故  
新書作崔寧不附已出兵襲旰不克旰  
因人之怨率麾下五千直擣成都英人拒戰衆皆反戈  
內攻乃奔簡州次靈池普州刺史韓澄斬首送旰遂屠

其家

王君奭字威明瓜州常樂人初事郭知運為別奏累功至右衛副率知運卒代為河西隴右節度使右羽林軍

將軍判涼州都督事開元十四年

舊書作十六年冬通鑑考異云據實錄及

吐蕃傳入寇在十四年冬舊傳誤也

吐蕃酋悉諾邏寇大斗谷掠甘州而

還君奭勒兵躡其後率秦州都督張景順乘冰度青海破其後軍獲輜重羊馬萬計以功遷大將軍封晉昌縣伯拜其父壽為少府監聽致仕君奭凱旋玄宗宴君奭

及妻夏於廣達樓賜金帛夏亦自以戰功封武威郡夫

人俄而吐蕃陷瓜州執刺史田元獻

舊書作田仁獻

及壽進攻

玉門軍使人謂君奭曰將軍常自以忠勇今不一進戰  
奈何君奭登陴西向哭兵不敢出初涼州有回紇契苾  
思結渾四部世為酋長君奭微時數往來為所輕及節  
度河西回紇等頗鞅鞅恥為下君奭又數督過之皆怨  
望潛遣人至東都言狀君奭間駟奏四部有叛謀帝使  
中人即訊回紇不能自直於是瀚海大都督回紇承宗

流瀼州渾大得流吉州賀蘭都督契苾承明流藤州盧  
山都督思結歸國流瓊州而承宗黨瀚海州司馬護輸  
等益不平思復怨會吐蕃使間道走突厥君奭率騎到  
肅州掩取之還至甘州護輸伏兵發奪君奭節殺左右  
親吏剖其心曰是始謀者君奭引帳下力戰兵盡乃死  
護輸欲以尸奔吐蕃追兵至乃棄尸去帝痛惜之贈特  
進荊州大都督以喪還京師詔張銳刻文墓碑帝自書  
以寵之始吐蕃寇瓜州分遣莽布支攻常樂令賈師順

乘城守俄而瓜州陷悉諾邏并兵攻之數日敵衆有姻  
家在城中使夜見師順曰州已失守敵悉衆來孤城渠  
可久不早降以全噍類乎師順曰吾受天子命守此義  
不可下賊數日又說師順曰明府不降吾衆且還宜有  
以贈我師順請脫士卒衣襦悉諾邏知無有乃夜徹營  
去毀瓜州城師順開門收拾器械復完守備吐蕃果使  
精騎還襲見有備乃去以功遷鄯州都督隴右節度使  
師順岐州人終左領軍將軍

張守珪陝州河北人姿幹瓌壯慷慨尚節義善騎射以平樂府別駕從郭虔瓘守北庭突厥侵輪臺遣守珪往援中道逢賊苦戰斬首千餘級禽頡斤一人開元初寇復攻北庭守珪間道奏事京師因上書言利害請引兵出蒲昌輪臺夾擊賊退再遷幽州良杜府果毅時盧齊卿為刺史器之引與共榻坐謂曰不十年子當節度是州為國重將願以子孫託稍遷建康軍使王君奭死河西震懼詔以守珪為瓜州刺史墨離軍使督餘衆完故



城版築方立敵奄至衆失色守珪曰創痍之餘詎可矢石相确須權以勝之遂置酒城上會諸將作樂敵疑有備不敢攻引去守珪縱兵擊敗之於是修復廨宇招流冗使復業有詔以瓜州為都督府即以守珪為都督州地沙磧不可藝常瀦雪水溉田是時渠竭為敵毀材木無所出守珪密禱於神一時水暴至大木數千章塞流下因取之修復堰坊耕者如舊州人神之刻石紀事遷鄯州刺史隴右節度使徙幽州長史河北節度副大使

俄加採訪處置等使契丹奚連年梗邊牙官可突于驍  
勇有謀畧前長史趙含章薛楚玉等不能拒守珪至每  
戰輒勝敵遂大敗帝喜詔有司告九廟契丹酋屈剌及  
突于恐懼乃遣使詐降守珪得其情遣右衛騎曹王悔  
詣部計事悔至敵無降意徙帳稍西北密引突厥衆將  
殺悔會契丹別帥李過折與突于爭權不叶悔因間誘  
之夜斬屈剌及突于盡滅其黨以衆降守珪次紫蒙川  
大開軍實賞將士傳屈剌突于首於東都二十三年入

見天子會籍田畢即酺燕為守珪飲至賦詩寵之加拜  
輔國大將軍右羽林大將軍賜金綵授二子官詔立碑  
紀功久之復討契丹餘黨於捺祿山鹵獲不訾會裨將  
趙堪白真陀羅等彊使平盧軍使烏知義度湟水邀叛  
奚且蹂其稼知義辭不往真陀羅矯詔脅之知義與敵  
鬪不勝還守珪匿其敗上克獲狀事頗泄帝遣謁者牛  
仙童按實守珪逼真陀羅自殺厚賂使者還奏如狀後  
仙童以贓敗事逮守珪以功貶括州刺史疽發背死子

獻誠

獻誠天寶末陷安祿山授偽署後事史思明將兵數萬  
守汴州東都平史朝義走還汴獻誠不納藉所統兵以  
州歸國詔即拜汴州刺史封南陽郡公改寶應軍左廂  
兵馬使更封鄧國公既來朝代宗禮賜尤渥擢山南西  
道節度使

舊書作觀察使按方鎮未廣德元年陞山南  
西道防禦守捉使為節度使尋降為觀察使

此敘獻誠授官  
之始宜從新書

討南山劇賊高玉禽之俄兼劍南東川

節度時崔旰殺郭英乂獻誠率衆戰梓州大敗大厯三

年以疾歸京師舉其從弟獻恭自代以檢校戶部尚書知省事病甚固乞辭位卒始獻誠喜功名為政寬裕有機略隨方制變而簡廉不逮於父

獻恭數有軍功以右羽林將軍代為節度使大厯末破吐蕃於岷州久之拜東都留守累遷檢校吏部尚書德宗欲徙盧杞為饒州刺史給事中袁高上還詔書苦爭獻恭見帝曰高所奏宜聽帝不答復前曰高乃陛下良臣當優異之上遂不徙杞世服其不撓子煦積閹亦至

夏州節度使元和八年振武軍逐節度使李進賢屠其家及判官嚴澈憲宗怒詔煦以本軍進討許以便宜賜縑三萬為軍資河東王鐸遣兵五千為援煦入捕亂卒蘇國珍等數百人誅之卒贈太子太保

獻甫亦獻誠從弟以軍功試光祿卿殿中監從河中節度使賈耽討梁崇義有勞德宗西幸又從渾瑊討朱泚戰多累遷至金吾將軍檢校工部尚書李懷光叛吐蕃盜邊獻甫領禁兵戍咸陽累年兵農悅安貞元四年代

韓游瓌領邠寧節度使邠寧軍素驕悍獻甫嚴因游瓌去遂縱掠邀范希朝為帥都將楊朝晟誅首亂者獻甫乃得入於是斷山浚塹選嚴要地築烽堡請復鹽州及洪門洛原鎮屯兵詔可獻甫遣兵馬使魏晃逐吐蕃築鹽夏二城虜衆畏不敢入寇十二年加檢校尚書左僕射卒贈司空

王忠嗣華州鄭人父海賓太子右衛率豐安軍使開元二年吐蕃寇隴右詔隴右防禦使薛訥率杜賓客郭知

運王峻安思順禦之以海賓為先鋒戰武階追北至壕  
口殺其衆進戰長城堡諸將媚其功按兵顧望海賓戰  
死大軍乘之斬賊萬七千級獲馬七萬牛羊四十萬玄  
宗憐其忠贈左金吾大將軍時忠嗣年九歲始名訓授  
尚輦奉御入見帝伏地號泣帝撫之曰此去病孤也須  
壯而將之更賜今名養禁中肅宗為忠王帝使與游及  
長雄毅寡言有武畧上與論兵應對鏗起帝罷之曰後  
日爾為良將試守代州別駕大猾閉門自斂不敢干法



數以輕騎出塞忠王言於帝曰忠嗣敢鬪恐亡之由是  
召還信安王禕在河東蕭嵩出河西數引為麾下帝以  
其年少有復讐志詔不得特將嵩入朝忠嗣曰從公三  
年無以歸報天子乃請精銳數百出塞會贊普大酋閱  
武鬱標川其下欲還忠嗣不從提刀畧陣斬數千人獲  
羊馬萬計嵩上其功帝大悅累遷左威衛將軍代北都  
督封清源縣男與皇甫惟明不協構忠嗣罪貶東陽府  
左果毅河西節度使杜希望欲取吐蕃新城

新書作  
新羅城有

言忠嗣才者希望以聞詔追赴河西進拔其城授左威衛郎將專知兵馬俄吐蕃大出欲報新城之役晨壓官軍陣衆寡不敵舉軍皆恐忠嗣單馬進左右馳突獨殺數百人賊衆翼相蹂軍彥翼掩之敵大敗拜左金吾衛將軍領河東節度副使大同軍使尋為節度使二十九年節度朔方兼靈州都督天寶元年北討奚奴皆戰桑乾河三遇三克耀武漢北高會而還時突厥新有難忠嗣進軍磧口經畧之烏蘇未施可汗請降忠嗣以其方

疆特文降耳乃營木刺蘭山謀虛實因上平戎十八策  
縱反間於拔悉密與葛邏祿回紇三部攻多羅斯城涉  
昆水斬米施可汗築大同靜邊二城徙清塞橫野軍實  
之併受降振武為一城自是敵不敢盜塞徙河東節度  
使進封縣公忠嗣本負勇敢及為將乃能持重安邊不  
生事嘗曰平世為將撫衆而已吾不欲竭中國力以幸  
功名故訓練士馬隨闕繕補有漆弓百五十斤每弦之  
示無所用軍中士氣盛日夜思戰忠嗣縱詭間伺敵隙

時時出奇兵襲之所向無不克故士亦樂為用軍每出召屬長付以兵使授士卒雖弓矢亦誌姓名其上軍還遺弦忘鏃皆按名第罪以是部下人人自勸罷甲充物自朔方至雲中袤數千里據要險築城堡斥地甚遠自張仁亶後四十餘年惟忠嗣繼其功俄為河西隴右節度使權朔方河東節度佩四將印勁兵重地控制萬里近世未有也授一子五品官後數出戰青海積石敵輒奔破又討吐谷渾於墨離平其國乃固讓朔方河東二

節度許之帝方事石堡城詔問攻取計忠嗣奏言石堡險固吐蕃舉國守之若頓兵堅城下費士數萬然後可圖恐所得不讐所失請厲兵馬待釁取之帝意不快而李林甫尤忌其功日鉤撫過咎會董延光建言請下石堡詔忠嗣分兵應接忠嗣不得已為出軍而士無賞格延光不悅河西兵馬使李光弼入說曰大夫愛惜士卒有拒延光心雖名受詔實奪其謀然以數萬衆付之而不立重賞何以鼓士勇且大夫惜數萬段賜以啓讒口

有如不捷歸罪大夫大夫先受禍矣忠嗣曰今以數萬衆爭一城得之不足制敵不得未害於國吾忍以數萬人命易一官哉明日見責不失一金吾羽林將軍歸宿衛不者黔中上佐耳光弼謝曰大夫乃行古人事非光弼所及也延光過期不克果訴忠嗣沮兵又安祿山城雄武扼飛狐塞謀亂請忠嗣助役因欲留其兵忠嗣先期至不見祿山而還數上言祿山且亂林甫益惡之陰使人誣告忠嗣嘗養宮中云吾欲奉太子帝怒召入付

三司訊驗罪當死哥舒翰方有寵白上請以官爵贖忠  
嗣罪帝意解貶漢陽太守久之徙漢東郡卒年四十五  
後翰引兵攻石堡拔之死亡畧盡如忠嗣言故當世號  
為名將初在朔方至互市輒高價馬直諸蕃爭來市故  
藩馬寢少唐軍精及鎮河隴又請徙朔方河東九千騎  
以實軍迄天寶末益滋息寶應元年追贈兵部尚書

牛仙客涇州鶉觚人初為縣小史令傅文靜罷之會為  
隴右營田使引與計事積功遷洮州司馬河西節度使

王君奭召為判官君奭死仙客獨得免蕭嵩代節度復委以軍政仙客清勤不懈接士大夫以信及嵩還執政因薦之稍遷太僕少卿判涼州別駕知節度留後事俄為節度使開元二十四年代信安王禕為朔方行軍大總管始在河西嗇事省用倉庫積鉅萬器械犀銳崔希逸代之即以聞帝令刑部員外郎張利貞新書作張利馳傳覆視如狀帝悅將用為尚書宰相張九齡持不可乃封隴西郡公實封戶二百李林甫探知帝旨稱其材會九



齡罷故以工部尚書同中書門下三品知門下事遙領  
河東節度副大使為相與時浮沈唯唯恭愿前後錫與  
緘度不敢用百司諮決無所處可輒曰如今式帝既用  
仙客知時議不歸乘間以問高力士高力士曰仙客本  
胥吏非宰相器帝忿然曰朕且用康誥蓋恚言也久之  
封幽國公加左相卒贈尚書右丞相謚曰貞簡

哥舒翰其先蓋突騎施酋長哥舒部之裔父道元為安  
西都護將軍赤水軍使故仍世居安西翰少補效穀府

果毅家富於財任俠重然諾縱捕酒長安市年四十餘  
遭父喪不歸不為長安尉所禮慨然發憤游河西事節  
度使王倬倬攻新城使翰經畧稍知名又事王忠嗣署  
衙將翰能讀左氏春秋漢書通大義疏財多施予故士  
歸心為大斗軍副使佐安思順不相下忠嗣更使討吐  
蕃副將倨見翰怒立殺之麾下為股抃遷左衛郎將吐  
蕃盜邊與翰遇苦拔海吐蕃枝其軍為三行從山差池  
下翰持半段槍迎擊所嚮輒披靡名益軍中擢授右武

衛將軍副隴右節度為河源軍使先是吐蕃候積石軍  
麥熟歲來取莫能禁翰乃使王難得楊景暉設伏東南  
谷吐蕃以五千騎入塞放馬褫甲將就田翰自城中馳  
至鏖鬪敵駭走追北伏起悉殺之隻馬無還者翰嘗逐  
敵馬驚陷於河吐蕃三將欲刺翰翰大呼皆擁矛不敢  
動救兵至追殺之翰有奴曰左車年十六以膂力聞翰  
工用槍追及賊擬槍於肩叱之賊反顧翰刺其喉剔而  
騰之高五尺許乃墮左車即下馬斬其首以為常會忠

嗣被罪帝召翰入朝部將請齎金帛以救忠嗣翰但齎  
襤裝曰使吾計從奚取於是不行用此足矣翰至帝虛  
心待與語異之拜鴻臚卿為隴右節度副大使翰已謝  
即極言忠嗣之枉帝起入禁中翰叩頭從帝且泣帝寤  
為未貸其罪忠嗣不及誅朝廷稱其義踰年築神威軍  
青海上吐蕃攻破之更築於龍駒島有白龍見因號應  
龍城翰相其川原宜畜牧謫罪人二千戍之由是吐蕃  
不敢近青海天寶八載詔翰以朔方河東羣牧兵十萬

攻吐蕃石堡城數日未克翰怒梓其將高秀巖張守瑜  
將斬之秀巖請三日期如期而下遂以赤嶺為西塞開  
屯田備軍實加特進賜賚彌渥十一載加開府儀同三  
司翰素與安祿山安思順不平帝每欲和解之會三人  
俱來朝帝使驃騎大將軍高力士宴城東翰等皆集詔  
尚食生擊鹿取血和腸為熟洛河以賜之翰母于闐王  
女也祿山謂翰曰我父胡母突厥公父突厥母胡族類  
本同安得不親愛翰曰諺言狐向窟嗥不祥以忘本也

兄既見愛敢不盡心祿山以翰譏其胡怒罵曰突厥敢爾翰欲應之力士目翰翰託醉去久之進封涼國公兼河西節度使攻破吐蕃洪濟大莫門等城收黃河九曲以其地置洮陽郡築神策宛秀二軍進封西平郡王賜音樂田園又賜一子五品官裨將賞拜有差宰相楊國忠惡祿山白發其反狀故厚結翰俄進太子少保翰嗜酒極聲色因風痺體不仁既疾廢遂還京師闔門不朝請十四載祿山反封常清以王師敗帝乃召見翰拜太

子先鋒兵馬元帥以田良邱為軍司馬蕭昕為判官王  
思禮鉗耳大福李承光高元蕩蘇法鼎管崇嗣為屬將  
大拔歸仁李武定渾萼契苾寧以本部隸麾下凡河隴  
朔方奴刺等十二部兵二十萬守潼關師始東先驅牙  
旗觸門墮注旄干折衆惡之天子御勤政樓臨送詔翰  
以軍行過門毋下百官郊餞旌旗亘二百里翰惶恐數  
以疾自言帝不聽然病痼不能事以軍政委良丘使王  
思禮主騎李承光主步三人爭長政令無所統一衆攜

弛無闢意明年進拜尚書左僕射同中書門下平章事  
祿山遣子慶緒攻關翰擊走之始安思順度祿山必反  
嘗為帝言得不坐翰既惡祿山又怨思順及是知重兵  
在已有所論請天子重違以偽為賊書遣思順者使關  
邏禽以獻翰因疏七罪請誅之有詔思順及弟元貞皆  
賜死徙放其家國忠始懼或說翰曰祿山本以誅國忠  
故稱兵今若留卒三萬守關悉精銳度漚水誅君側此  
漢挫七國計也思禮亦勸翰翰猶豫未發謀頗露

通鑑  
載王



思禮密說哥舒翰使抗表請誅國忠翰不應思禮又請以三十騎劫取以來至潼關殺之翰曰如此乃翰反非祿山也考異曰玄宗實錄云或勸翰留兵二萬守關悉以精銳回誅楊國忠此漢挫七國之計也翰心許之未發有客泄其謀於國忠國忠大懼按翰若回兵誅國忠則正與祿山無異思禮勸翰抗表言國忠罪猶不敢況敢舉兵乎事必不然且翰雖心許他人安得知之正由翰按兵不進故國忠及其黨疑懼恐翰回兵誅之其實翰無此心也若果欲誅國忠則安肯慟哭出關乎今按新舊唐書皆同玄宗實錄故附載考異之言以正之

國忠大駭入見帝曰兵法安不忘危大兵在潼關而無後殿萬有一不利京師危矣即募牧兒三千人日夜訓練以劒南列將分統之又募萬人屯灊上使腹心杜乾

運為帥翰疑圖已表請乾運兵隸節下因詭召乾運計  
事者至軍即斬首梟牙門并其軍國忠愈恐謂其子曰  
吾無死所矣翰數奏言祿山雖竊據河朔不得人心請  
持重以敵之待其離隙可不血刃而禽賊將崔乾祐守  
陝郡仆旗鼓羸師以誘戰覘者曰賊無備可圖也帝信  
之詔翰進討翰報曰祿山習用兵今始為逆不能無備  
是陰計誘我賊遠來利在速戰王師堅守毋輕出關計  
之上也且四方兵未集宜觀事勢不必速當是時祿山

雖盜河洛所過殘殺人人怨之淹時月不能進尺寸地  
又郭子儀李光弼兵益進取常山十數郡祿山始悔反  
矣將還幽州以自固而國忠計迫謬說帝趣翰出潼關  
復陝洛時子儀光弼遙計曰翰病且耄賊素知之諸軍  
烏合不足戰今賊悉銳兵南破宛洛而以餘衆守幽州  
吾直擣之覆其巢窟質叛族以招逆徒祿山之首可致  
若師出潼關變生京師天下殆矣乃極言請翰固關無  
出軍而帝入國忠之言使使者趣戰項背相望也翰窘

不知所出六月引而東慟哭出關次靈寶西原與乾祐戰由關門七十里道險隘其南薄山北阻河賊以數千人先伏險翰浮舟中流以觀軍謂乾祐兵寡易之促士卒進道岨無行列賊乘高頽石下擊殺士甚衆翰與良丘登北阜以軍三萬夾河鳴鼓思禮等以精卒居前餘軍十萬次之乾祐為陣十五五或卻或進而陌刀五千列陣後王師視其陣無法指觀嗤笑曰禽賊乃會食及戰乾祐旗少偃如欲遜者王師懈不為備伏忽起薄

戰皆奮死鬪翰以氈蒙馬車畫龍虎飾金銀爪目將駭  
賊倚戈矢逐北賊負薪塞路順風火其車燂焱熾突騰  
煙如夜士不復相辨自相鬪殺尸血狼籍久乃悟又棄  
甲奔山谷及蹈河死者十一二有糧艘百餘軍爭濟艘  
輒沈至縛矛盾乘以度喧叫振天地賊乘之奔潰略盡  
始開門有三塹廣二丈深一丈士馬奔蹙相壓逆少選  
塹平後至者踐之以入既敗翰引數百騎絕河還營羸  
兵裁八十至潼津收散卒復守關乾祐進攻於是大拔

歸仁等紿翰出關翰曰何邪曰公以二十萬衆一日覆沒持是安歸公不見高仙芝等事乎翰曰吾寧效仙芝死汝舍我歸仁不從執以降賊械送洛陽京師震動由是天子西幸祿山見翰責曰汝常易我今何如翰俯伏謝罪曰陛下撥亂主今天下未平李光弼在土門來瑒在河南魯炆在南陽臣為陛下以尺書招之三面可平祿山悅即署司空同中書門下平章事執火拔歸仁曰背主忘義吾不容爾斬之翰以書招諸將諸將皆讓翰

不死節祿山知事不可就囚之東京平安慶緒以翰度

河及敗乃殺之

舊書云祿山聞翰於苑中  
潛殺之與新書通鑑不同

翰為人嚴少

恩軍行未嘗卹士飢寒有陷民樵者痛笞辱之監軍李

大宜在軍中不治事與將士檮糲飲酒彈箏篴琵琶為

樂而士米粒不饜帝令中人袁思藝勞師士皆訴衣服

穿空帝即斥御服餘者製袍十萬以賜其軍翰藏庫中

及敗封鐫如故先是有客梁慎初遺翰書請堅壁勿戰

以屈賊翰善之奏為左武衛曹參軍留幕府及翰與

國忠貳慎初曰難將作矣乃遁去翰失守華陰馮翊上洛郡官吏皆潰帝遣劔南將劉光庭等將新募兵萬餘人往助翰未至而翰被縛云其後贈太尉諡曰武愍

子曜字子明八歲玄宗召見華清宮擢尚輦奉御累遷光祿卿以翰陷賊哀憤號慟故吏裴冕杜鴻漸等見之歎息李光弼討河北曜請行拜鴻臚卿為光弼副降安太清救宋州有功改殿中監襲封為東都鎮守兵馬使德宗立召為左龍武大將軍李希烈陷汝州以周冕為



偽刺史詔拜曜東都汝州行營節度使將鳳翔邠寧涇  
原奉天好時兵萬人討希烈帝召見問曰卿治兵孰與  
父賢對曰先臣臣安敢比但斬長蛇殪封豕然後待罪  
私室臣之願也帝曰爾父在開元時朝廷無西憂今朕  
得卿亦不東慮及行帝祖通化門是日牙干折時以翰  
出師已如此而斬持旗者卒以敗今曜復爾人憂之曜  
擊賊收汝州禽是以獻斬其將二人希烈退保許州詔  
城裏城曜以疲人版築不如按甲持重以挫之帝不許

有詔督戰曜進次穎橋雷震軍中七馬斃曜懼還屯襄  
城希烈遣衆萬人縱火攻柵殪人於塹以薄壘曜苦戰  
破之居數月希烈自率兵三萬圍曜築甬道屬城矢集  
如雨帝遣神策將劉德信以兵三千援之又詔河南都  
統李勉出兵相犄角勉以希烈在外許守兵少乘虛襲  
之希烈自解乃遣部將與德信趨許未至有詔切讓使  
班師德信等惶惑還軍無斥候至危澗為賊設伏詭擊  
死者殆半器械輜重皆亡德信走汝州勉恐東都危使

將李堅華以兵四千往守賊梗道不得入汴兵沮襄城圍益急帝乃召魯王以荆襄江西鄂沔之師討蔡州詔涇原節度使姚合言救襄城未行京師亂帝幸奉天襄城陷曜走洛陽會母喪奪為東都畿汝節度使遷河南尹曜拙於統御而銳殺戮士畏而不懷貞元元年部將叛夜焚河南門曜挺身免帝以汴州刺史薛瑑代之召入為鴻臚卿終右驍衛上將軍贈幽州大都督子七人俱以儒聞烜茂才高第有節槩崕岷岷皆明經擢第

高仙芝高麗人父舍難初以將軍隸河西軍為四鎮校將仙芝年二十餘從至西安以父功補遊擊將軍數年父子並班仙芝美姿質善騎射父猶以其儒緩憂之初事節度使田仁琬蓋嘉運等不甚知名後事夫蒙靈訔乃善遇之開元末表為安西副都護四鎮都知兵馬使小勃律其王為吐蕃所誘妻以女故西北二十餘國皆羈屬吐蕃自仁琬以來三討之皆無功天寶六載詔仙芝以步騎一萬出討是時步兵皆私馬自隨仙芝乃

自安西過撥換城入握瑟德經疏勒登蔥嶺涉播密川  
遂頓軍特滿川行凡百日特滿川即五識匿國也仙芝  
乃分軍為三使疏勒趙崇玘自北谷道撥換賈崇瓘自  
赤佛道仙芝與監軍邊令誠自護蜜俱入約會連雲堡  
堡有兵千餘城南因山為柵兵九千守之城下據婆勒  
川會川漲不得渡仙芝殺牲祭川命士人齋三日糒集  
水涯士不甚信既涉旗不需羈不需兵已成列仙芝喜  
告令誠曰嚮吾方涉賊擊我我無類矣今既濟而陣天

以賊賜我也遂登山挑戰日未中破之拔其城斬五千級生擒千人馬千餘匹衣資器甲數萬計仙芝欲遂深入令誠懼不肯行仙芝留羸弱三千使守遂引師行三日過坦駒嶺嶺峻絕下四十里仙芝恐士憚險不敢進乃潛遣二十騎衣阿弩越胡服來迎先語部校曰阿弩越胡來迎我無慮矣既至士不肯下曰公驅我何去會二十人至曰阿弩越胡來迎已斷娑夷橋矣仙芝即陽喜令士盡下娑夷河弱水也既行三日越胡來迎明日

至阿弩越城遣將軍席元慶以精騎一千先往謂小勃  
律王曰不聞若城吾假道趨大勃律耳城中大酋領皆  
吐蕃腹心仙芝密令元慶曰若酋領逃者第出詔書呼  
之賜以繒綵至皆縛以待我元慶如言仙芝至悉斬之  
王及妻逃山穴不可得仙芝招諭乃出降因平其國急  
遣元慶斷娑夷橋其暮吐蕃至不克度橋長度一箭所  
及者功一歲乃成八月仙芝以小勃律王及妻自赤佛  
道還連雲堡與令誠俱班師於是拂菻大食等共七十

二國皆震懾降附仙芝遣判官王庭芬奏捷京師軍至河西靈譽怒不迎勞既見罵曰高麗奴于闐使爾何從得之仙芝懼且謝曰中丞力也又曰馬耆鎮守使安西副都護都知兵馬使皆何從得之答曰亦中丞力也靈譽曰審若此捷書不待我而敢即奏何邪奴當斬顧新立功故貸爾仙芝不知所為令誠密言狀於朝且曰仙芝立功而以憂死後孰為朝廷用者帝乃擢仙芝鴻臚卿假御史中丞代靈譽為四鎮節度使而詔靈譽還靈



營懼仙芝朝夕見輒趨走靈營益慙副都護程千里衛  
將畢思琛行官王滔康懷順陳奉忠等皆嘗譖仙芝於  
靈營者既視事呼千里嫚罵曰公面雖男兒而心似婦  
女何邪謂琛曰爾奪吾城東千石種田憶之乎又召滔  
欲捽辱良久皆釋曰吾不恨矣由是舉軍安之俄加左  
金吾衛大將軍與一子五品官九載討石國其王車鼻  
施約降仙芝為俘獻闕下斬之由是西域不服其王子  
走大食乞兵攻仙芝於怛邏斯城以直其冤仙芝為人

貪破石國獲瑟瑟十餘斛黃金五六橐駝良馬寶玉甚衆家資累鉅萬然亦不甚愛惜人有求輒與不問幾何尋除武威太守代安思順為河西節度使羣胡固留思順更拜右羽林軍大將軍封密雲郡公祿山反榮王為元帥仙芝副之領飛騎彊騎及朔方等兵出禁財募關輔士五萬繼封常清東討帝御勤政樓引榮王受命宴仙芝以下帝又幸望春亭勞遣詔監門將軍邊令誠監軍次陝郡而常清敗還仙芝急乃開太原倉悉以所有

賜士卒焚其餘引兵趨潼關會賊至甲仗資糧委於道  
彌數百里既至關勒兵繕守具士氣稍稍復振賊攻關  
不得入乃引還初令誠數私於仙芝仙芝不應因言其  
逗撓狀以激帝且云常清以賊搖衆而仙芝棄陝地數  
百里腹盜竄賜帝大怒使令誠即軍中斬之令誠已斬  
常清陳尸於蓬蔭仙芝自外至今令誠以陌刀百人自從  
曰大夫亦有命仙芝遽下曰我退罪也死不敢辭然以  
我為盜資糧誣也謂令誠曰上天下地三軍皆在君豈不

知又顧麾下曰我募若輩本欲破賊取重賞而賊勢方銳故遷延至此亦以固關也我有罪若輩可言不爾當呼枉軍中咸呼曰枉其聲殷地仙芝視常清尸曰公我所引拔又代吾為節度今與公同死豈命歟遂就死

封常清蒲州猗氏人外祖教之讀書多所該究然孤貧年過三十未有名夫蒙靈譽為四鎮節度使以高仙芝為都知兵馬使嘗出軍奏僦從三十餘人衣襦鮮明常清慨然投牒請豫常清素瘠又跛仙芝陋其貌不納

明日復至仙芝謝曰儻已足何庸復來常清怒曰我慕公義願事鞭勒故無媒自前公何見拒深乎以貌取士恐失之子羽仙芝猶未納乃日候門下仙芝不得已竄名儻中會達奚諸部叛自黑山西趣碎葉有詔邀擊靈譽使仙芝以三千騎追躡達奚行遠人馬疲禽馘略盡常清於幕下潛作捷布具記井泉次舍克賊形勢謀略條最明審仙芝取讀之皆意所欲出乃大駭即用之軍還靈譽迎勞仙芝已去奴祿帶刀而判官劉眺獨孤峻

爭問向捷布誰作者公幕下安得此人答曰吾嫌封常清也眺等驚進揖常清坐與語異之遂知名以功授疊州戍主仍為判官仙芝破小勃律代靈荅為安西節度使常清以從戰有勞擢慶王府錄事參軍事為節度判官仙芝征討常知留務常清才而果曾無疑事仙芝委家事於郎將鄭德詮其乳母子也威動軍中常清嘗自外還諸將前謁德詮見常清始貴易之走馬突常清駟士去常清命左右引德詮至廷中門輒閉因離席曰吾

起細微中丞公過聽以主留事郎將安得無禮因叱曰  
須暫假郎將死以肅吾軍因杖死以面仆地曳出之仙  
芝妻及乳母哭門外救請不能得遽以狀白仙芝仙芝  
驚及見常清憚其公不敢讓常清亦不謝會大將有罪  
又殺二人軍中莫不股慄仙芝節度河西復請為判官  
久之擢安西副大都護安西四鎮節度副大使知節度  
事未幾改北庭都護持節伊西節度使常清性勤儉耐  
勞苦出軍乘騾私廩裁二馬賞罰分明天寶末入朝而

安祿山反帝引見問何策以討賊常清見帝憂因大言  
曰天下太平久人不知戰然事有逆順勢有奇變臣請  
馳至東京悉府庫募驍勇挑馬箠度河計日取逆賊首  
以獻闕下天子壯之明日以常清為范陽節度副大使  
乘驛赴東京常清募兵得六萬人然皆市井庸保乃部  
分旗幟斷河陽橋以守賊移書平原令太守顏真卿以  
兵七千防河真卿馳使司兵參軍事李平入奏常清取  
平表發視即倚帳作書遺真卿勸堅守且傳購祿山檄



數十函與之真卿得以分曉諸郡祿山度河陷滎陽入

覓子谷先驅至葵園

按通鑑云封常清所募兵皆白徒未更訓練屯武牢以拒賊賊以鐵

騎蹂之官軍大敗常清收餘衆戰於葵園又敗新舊書不載武牢敗事蓋史脫也常清使驍騎

拒之殺拓羯數十百人賊大軍至常清不能禦退入上

東門戰不利賊鼓而進劫官吏再戰於都亭驛又不勝

引兵守宣仁門復敗乃自提象門出伐大木塞道以殿

至穀水西奔陝語高仙芝曰賊銳甚難與爭鋒潼關無

兵一夫奔突則京師危不如急守潼關仙芝從之敗書

聞帝削常清官使白衣隸仙芝軍効力仙芝使衣黑衣  
監左右部軍及邊令誠以詔書至示之常清曰吾所以  
不死者恐汙國家節度戮賊手今死乃甘心始常清敗  
徑入關欲見上陳討賊事至渭南有詔赴潼關常清憂  
懼為表以謝且言自東京陷三遣使表論成敗不得對  
又言臣死後望陛下無輕此賊則社稷安至是臨刑以  
表授令誠而死人多哀之

欽定續通志卷二百三十七

欽定四庫全書

欽定續通志卷二百三十八

列傳

唐 三十八

李光弼

荔非元禮  
張伯儀

郝廷玉  
白元光

李國臣  
陳利貞

白孝德  
侯仲莊

柏良器  
烏承玳

郭子儀

曜

晞

承嘏

曖  
利  
幼明

李光弼營州柳城人父楷洛本契丹酋長武后時入朝

累官左羽林大將軍封薊郡公吐蕃寇河源楷洛率精  
兵擊走之師還卒於道贈營州都督諡曰忠烈光弼嚴  
毅沈果有大略起家左衛親府左郎將累遷左清道率  
兼安北都護補河西王忠嗣府兵馬使充赤水軍使忠  
嗣遇之厚雖宿將莫能比嘗曰它日得我兵者光弼也  
俄襲父封以破吐蕃吐谷渾功進雲麾將軍朔方節度  
使安思順表為副知留後事愛其材欲以子妻之光弼  
引疾去隴右節度使哥舒翰異其操表還長安安祿山

反郭子儀薦其能詔攝御史大夫持節河東節度副大  
使知節度事兼雲中太原尋加魏郡太守河北採訪使  
光弼以朔方兵五千出土門東救常山次真定常山團  
結子弟執賊將安思義降自顏杲卿死郡為戰區露背  
蔽野光弼酹而哭之出為賊幽閉者厚恤其家時賊將  
史思明李立節蔡希德攻饒陽光弼得思義不殺問其  
計答曰今軍行疲勞逢敵不可支不如按軍入守料勝  
而出敵兵焱銳弗能持重苟不獲利氣沮心離於時乃

可圖矣光弼曰善據城待明日思明兵二萬傳堞光弼兵不得出乃以勁弩五百射之賊退徙陣稍北光弼出其南夾潯沱而軍思明恃近救解鞍休士是日饒陽賊五千至九門光弼諜知之提輕兵斂旂鼓伺賊方飯襲殺之且盡思明懼引去以奇兵斷饒道馬食薦藉相守四十餘日會郭子儀收雲中詔悉衆出井陘與光弼合擊賊九門西思明大敗挺身走趙郡立節中流矢死

通鑑

中郎將渾瑊射李立節殺之

希德走鉅鹿收橐城等十縣遂攻趙詔

加光弼范陽大都督府長史范陽節度使思明繇趙郡  
入博陵殺官吏景城河間信都清河平原博平六郡之  
民結營以拒賊至是皆附光弼光弼急攻趙一日拔之  
士多虜掠光弼坐譙門收所獲悉歸之民大悅進圍博  
陵未下與子儀合擊思明於嘉山大破之光弼以范陽  
本賊巢窟當先取之握賊根本會潼關失守乃拔軍入  
井陘肅宗即位詔以兵赴靈武更授戶部尚書同中書  
門下平章事節度如故光弼以景城河間兵五千入太

原前此節度使王承業政弛謬侍御史崔衆主兵太原  
每狎侮承業光弼素不平及是詔衆以兵付光弼衆見  
光弼長揖不即付兵光弼怒收繫之會使者至拜衆御  
史中丞光弼曰衆有罪已前繫今但斬侍御史若使者  
宣詔即斬中丞使者內詔不敢出乃斬衆以徇威震三  
軍至德二載思明希德率高秀巖牛廷玠將兵十萬攻  
光弼時銳兵悉赴朔方而麾下卒不滿萬衆議培城以  
守光弼曰城環四十里賊至治之徒疲吾人乃徹民屋



欽定四庫全書

隅以止息經府門不顧圍解閱三昔乃歸私寢收清夷  
橫野等軍賊別將攻好時破大橫關光弼追敗之加檢  
校司徒尋遷司空封鄭國公食實戶八百乾元元年入  
朝詔朝官四品以上郊謁進兼侍中與九節度圍安慶  
緒於相州大戰鄴西敗之光弼與諸將議思明勒兵魏  
州欲以怠我不如起軍逼之彼懲嘉山之敗不敢輕出  
得曠日持久則慶緒可禽觀軍容使魚朝恩固謂不可  
既而思明來援光弼拒賊戰尤力殺略大當會諸將驚

潰各引歸所在剽掠獨光弼整衆還太原帝貸諸將罪以光弼兼幽州大都督長史知諸道節度行營事又代子儀為朔方節度使未幾為天下兵馬副元帥光弼以河東騎五百馳東都夜入其軍且謂賊方闕洛當扼虎牢帥師東出河上檄召兵馬使張用濟用濟憚光弼嚴教諸將逗留其兵用濟單騎入謁光弼斬之以辛京杲

代

按通鑑云張用濟屯河陽光弼檄召之用濟曰朔方非叛軍也乘夜而入何見疑之甚耶與諸將謀以精

銳突東京逐光弼請子儀命其士皆被甲上馬馬銜枚以待僕因懷恩康元寶止之所載較新舊書本傳為詳

復追都將僕固懷恩懷恩懼先期至會滑汴節度使許叔冀戰不利降賊思明乘勝西嚮光弼敦陣徐行趨東京謂留守韋陟曰賊新勝難與爭鋒欲詘之以計然洛無見糧危逼難守公計安出陟曰益陝兵公保潼關可以持久光弼曰兩軍相敵尺寸地必爭今委五百里而守關賊得地勢益張不如移軍河陽北阻澤潞勝則出敗則守表裏相應賊不得西此援臂勢也夫辨朝廷之禮我不如公論軍旅勝負公不如我陟不能答判官韋

損曰東都乃帝宅公當守之光弼曰守之則汜水崕嶺龍門皆當置兵子能盡守乎遂檄河南縱官吏避賊閉無留人督軍取戰守備思明至偃師光弼悉軍趨河陽身以五百騎殿賊游騎至石橋諸將曰並城而北乎當石橋進乎光弼曰當石橋進夜甲士秉炬徐行部曲堅重賊不敢逼已入三城衆二萬軍纔十日糧光弼按閤守備部分士卒無不嚴辦思明入洛陽空無所得憚光弼倚其後無敢犯宮闕頓白馬祠治塹溝築月城以守賊

攻光弼與戰中渾西破逆黨斬千級溺死者甚衆生執  
五千人初光弼謂李抱玉曰將軍能謂我守南城二日  
乎抱玉曰過期何若曰棄之抱玉許諾即紿賊曰吾糧  
盡明日當降賊喜斂兵待期抱玉已繕完即請戰賊忿  
欺急攻之抱玉出奇兵夾擊俘獲過當賊帥周摯引却  
光弼自將治中渾樹壁掘塹擊捨南城攻中渾光弼遣  
荔非元禮出勁卒於羊馬城以拒賊摯大潰收兵復振  
與安太清合衆三萬攻北城光弼斂軍入登陴望曰彼

軍雖銳然方陣而囂不足虞也日中當破乃出戰及期未決召諸將曰彼彊而可破者亂也今以亂擊亂宜無功因問賊陣何所最堅曰西北隅召郝廷玉曰為我以麾下破之請騎兵五百與之三百復問其次曰東南隅召論惟貞當之請鐵騎三百與之二百光弼執大旗曰望我旗麾若緩可觀便宜若三麾至地諸軍畢入生死以之退者斬既而馮堞望廷玉軍不能前趣左右取其首來廷玉曰馬中矢非卻也乃命易佗馬有裨將援矛

刺賊洞馬腹中數人又有迎賊不戰而卻者光弼召援  
矛者賜絹五百匹不戰者斬光弼麾旗三諸軍爭奮賊  
衆奔敗斬首萬餘級俘八千餘人馬二千軍資器械以

億計禽周摯徐璜王李秦授

按通鑑云周摯以數騎遁  
去又考異云李秦授上元

元年四月乃見禽周摯二年三月為史朝義所殺  
據此則新舊本傳稱周摯李秦授見禽者皆誤

惟太

清挺身走思明未知猶攻南城光弼驅所俘示之思明  
大懼築壘以拒官軍始光弼將戰內刀於韉曰戰危事  
吾位三公不可辱於賊萬有一不捷當自刎以謝天子



及是西向拜舞三軍感動太清襲懷州守之上元元年  
加太尉中書令進圍懷州思明來救光弼再逐北思明  
見兵河清聲渡河絕餉路光弼壁野水渡既夕還軍留  
牙將雍希顥守曰賊將高暉通鑑作高廷暉李日越萬人敵也  
賊必使劫我爾留此賊至勿與戰若降與偕來左右竊  
怪語無倫是日思明果召日越曰光弼野次爾以鐵騎  
五百夜取之不然無歸日越至壘使人問曰太尉在乎  
曰去矣兵幾何曰千人將為誰曰雍希顥日越謂其下

曰我受命云何今顧獲希顥歸不免死遂請降希顥與俱至光弼厚待之表授特進右金吾大將軍高暉聞亦降或問公降二將何易也光弼曰思明再敗恨不得野戰聞我野次彼固易之命將來襲必許以死希顥無名不足以爲功日越懼死不降何待高暉材出日越之右降者見遇貳者得不思奮乎諸軍決丹水灌懷州未下光弼令廷玉由地道入得其軍號登陴大呼王師乘城禽太清楊希仲送之京師獻俘太廟進食實戶一千五

百思明使諜宣言賊將士皆北人謳唵思歸朝思信之  
屢上賊可滅狀詔諭光弼光弼固言賊方銳未可輕動  
僕固懷恩媚光弼功陰佐朝思陳掃除計使者來督戰  
光弼不得已令李抱玉守河陽出師次北邨光弼使傅  
山陣懷恩曰我用騎今迫險非便地請陣諸原光弼曰  
有險可以勝可以敗陣于原敗斯殲矣懷恩不從賊據  
高原以長戟七百壯士執刀隨之委物偽遁懷恩軍爭  
剽獲伏兵發官軍大潰懷州復陷光弼度河保聞喜抱

王以兵寡棄河陽光弼請罪帝以懷恩違令覆軍優詔  
召光弼入朝懇讓太尉更拜開府儀同三司中書令河  
中尹晉絳等州節度使未幾復拜太尉兼侍中河南副  
元帥知河南淮南東西山南東荆南五道節度行營事

實錄舊紀皆云光弼都統河南淮南山南東江東五道  
唐歷會要為河南淮南東西山南東荆南五道劉展亂  
紀又有江西浙東浙西  
凡八道新傳蓋從唐歷鎮泗州帝為賦詩以餞朝義乘

邛山之捷進略申光等十三州光弼與疾就道監軍使  
以兵少請保揚州光弼曰朝廷以安危寄我賊安知吾

衆寡若出不意當自潰遂疾驅入徐州時朝義圍李岑  
於宋州使田神功擊走之初神功平劉展逗遛淮南尚  
衡殷仲卿相攻兗鄆間來瑱擅襄陽及光弼至屯朝義  
走神功還河南瑱衡仲卿踵入朝其為諸將憚服類此  
寶應元年進封臨淮郡王光弼收許州斬賊贏千級縛  
偽將二十二人朝義分兵攻宋州光弼破走之浙東賊  
袁晁反台州殘剽州縣光弼遣麾下破其衆於衢州廣  
德元年遂禽晁浙東平詔增實封戶二千與一子三品

階賜鐵券名藏太廟圖形陵烟閣相州北邙之敗朝恩  
羞其策繆故深忌光弼而程元振尤疾之二人用事日  
謀有以中傷者及來瑱為元振讒死光弼愈恐吐蕃寇  
京師代宗詔入援光弼畏禍遷延不敢行及帝幸陝猶  
倚以為重其母在河中數遣使存問以解嫌疑帝還長  
安因拜東都留守察其去就光弼以就江淮糧運引兵  
歸徐州自是諸將田神功等不復稟畏光弼愧恨成疾  
二年薨年五十七帝遣使弔恤其母贈太保諡曰武穆

詔百官送葬延平門外光弼居父喪三年不入妻室事  
繼母至孝好讀班固漢書其用兵謀定而後戰能以少  
覆衆治師訓整天下服其威名軍中指顧諸將不敢仰  
視初與郭子儀齊名世稱李郭而戰功推為中興第一  
其代子儀朔方也營壘士卒麾幟無所更而光弼一號  
令之氣色乃益精明云子彙有志操官至涇原節度使  
罷軍中雜徭出奉錢贖將士質賣子還其家卒贈工部  
尚書光弼弟光進字太應初為房瑄裨將將北軍戰陳

濤斜兵敗奔行在肅宗宥之代宗即位拜檢校太子太保封涼國公吐蕃入寇至便橋郭子儀為副元帥光進及郭英又佐之自至德後與李輔國並掌禁兵委以心膂光弼被譖出為渭北邠寧節度使永泰初封武威郡王累遷太子太保卒母李有鬚數十長五寸許死葬長安南原將相奠祭凡四十四幄時以為榮光弼所部將李懷光僕固懷恩田神功李抱玉董秦哥舒曜韓游環渾釋之辛京杲自有傳若荔非元禮郝廷玉李國臣白孝



德張伯儀白元光陳利貞侯仲莊柏良器皆章章可稱  
列者附次左方

荔非元禮起裨將累兼御史中丞光弼守河陽周摯攻  
北城光弼方壁中渾摯聞併兵從光弼光弼使元禮守  
羊馬城於城東北隅建小旗以望摯軍摯恃衆直逼城  
以車千乘載木鵝橦車麾兵填塹八道並進光弼諭元  
禮曰中丞視賊過兵不顧何也報曰公欲守耶戰耶光  
弼曰戰曰戰則賊實為我塹何為禁之光弼曰吾慮不

及此公勉之元禮遂出戰摯軍小卻元禮以敵堅未可  
以馳還軍示弱急其意光弼怒使召元禮欲按軍法答  
曰方戰不及往請破賊以見因休柵中良久顧麾下曰  
向公來召殆欲斬我關死有名無庸受戮乃下馬持刀  
瞋目直前銳士堵而進左右奮擊一當數人斬賊數百  
首摯遁去以功累遷驃騎大將軍懷州刺史知鎮西北  
庭行營節度使上元二年光弼進收洛陽軍敗元禮徙  
軍翼成為麾下所害

郝廷玉驍勇善格鬪為光弼愛將及保河陽禽徐璜玉  
功為多累封安邊郡王授神策軍將吐蕃犯京畿與馬  
璘屯中渭橋它日魚朝恩聞其善布陣請觀之廷玉申  
號令鳴鼓角部伍坐作進退若一朝恩嘆服廷玉惻然  
曰此臨淮王遺法也王善御軍賞當功罰適過每校旗  
不如令者輒斬由是人皆自効自臨淮歿無復校旗事  
此安足賞哉累為秦州刺史卒贈工部尚書

李國臣河西人本姓安力能抉闕以折衝從收魚海五

城遷中郎將後為朔方將積勞擢雲麾大將軍賜姓李  
從光弼守河陽累封臨川郡王大厯八年為鹽州刺史  
吐蕃敗渾瑊於黃菩原將略汧隴國臣曰賊乘勝必擾  
京師我趨秦原彼當反顧乃引兵登安樂山鳴鼓而西  
日行三十里吐蕃聞之自百里城回軍踰險瑊因擊敗  
之卒贈揚州大都督

白孝德安西人事光弼為偏裨史思明攻河陽使驍將  
劉龍仙以騎五千挑戰加右足馬鬣上嫚罵光弼光弼

登城顧諸將曰孰能取是賊僕固懷恩請行光弼曰是非大將所宜左右以孝德對召問須兵幾何對曰願選五十騎為後繼大軍鼓譟以張吾氣足矣光弼撫其背遣之孝德擁二矛策馬絕河半濟懷恩賀曰事克矣觀其攬轡安閑決可萬全龍仙見其獨來甚易之稍近將動孝德搖手止之曰侍中使致辭無它與語息馬良久瞋目曰賊識我乎我白孝德也龍仙罵之乃躍馬前搏城上因大譟五十騎繼後進龍仙環隄走孝德追及斬

其首而還後累功至北庭行營節度使徙邠寧僕固懷恩引吐蕃兵入寇孝德擊敗之永泰初吐蕃回紇圍涇陽郭子儀說回紇約盟吐蕃退走子儀使渾瑊以兵五千出奉天命孝德應之大戰赤沙峯斬獲甚衆累封昌化郡王歷太子太傅建中元年卒贈太保

張伯儀魏州人以戰功隸光弼軍浙賊袁晁反使伯儀討平之功第一擢睦州刺史後為江陵節度使樸厚不知書然推誠遇人軍中畏肅民亦便之李希烈反詔與

賈耽張獻甫收安州戰不利伯儀中流矢師却失所持  
節賊追及奮力以禦之兩刃相嚮不得下會救至免至  
漢水拏野人船以達沔州徐收散卒還久之除右龍武  
統軍卒贈揚州大都督既請諡博士李吉甫議以伯儀  
雖敗而其忠可錄諡曰恭

白元光其先突厥人父道生歷寧朔州刺史元光初隸  
本軍補節度先鋒安祿山反詔徙朔方兵東討元光領  
所部結義營長驅從光弼出土門累遷太子詹事封南

陽郡王為兩都游奕使長安平率兵清宮進擊餘寇身  
被數創肅宗躬為博藥轉衛尉卿兼朔方先鋒史思明  
攻河陽光弼召主騎軍其後歷靈武留後定遠城使貞  
元二年卒贈越州都督

陳利貞幽州范陽人初為平盧將安祿山亂從光弼軍  
河南張巡被圍睢陽也光弼遣郝廷玉及利貞救之輕  
騎出入廷玉稱為勝己以子妻之及歸薦於光弼自行  
間累遷檢校太子賓客封靜戎郡王李希烈叛詔哥舒



曜東討利貞為前鋒次邾城賊衆大集利貞出奇兵五百橫擣其右賊鋒詘數月不敢前及希烈攻曜襄城利貞登陴捍守七十日未嘗櫛沐非議事不下城朱泚反利貞及張廷芝所統士皆幽薊河隴人故與廷芝合謀應泚而利貞麾下亦從為亂夜半難作利貞拔劍當軍門大譁曰欲過門者先殺我衆畏其鋒乃止廷芝出奔德宗嘉之擢汝州防禦使貞元五年卒

侯仲莊蔚州人為光弼先鋒授忠武將軍禽安太清有

功累加冠軍將軍僕固懷恩以朔方反仲莊為都將訓兵自守人畏其鋒懷恩敗郭子儀代之引為心腹封上谷郡王為神策京西將德宗幸奉天遷左衛將軍為防城使修壘堞晝夜執戈徼巡從幸興元殿軍駱谷授防禦招討使帝還都復鎮奉天幾二十年卒贈洪州都督柏良器字公亮魏州人父造以獲嘉令死安祿山難乃學擊劍欲報賊父友王奐為光弼從事見之曰爾額文似臨淮王面黑子似顏平原殆能立功乃薦之光弼授

兵平山越遷左武衛中郎將以部兵隸浙西豫平袁晁  
方清其後潘獐虎胡參分據小傷蒸里又擊破之是時  
年二十四更戰陣六十二李希烈圍寧陵過水灌之親  
令軍中明日拔城良器以救兵至擇弩手善游者沿汴  
渠夜入及旦伏弩發賊乘城者皆死錄功封平原郡王  
入為左神策軍大將軍知軍事圖形凌烟閣募材勇以  
代士卒市販者中尉竇文場惡之坐友人闌入換石領  
軍衛自是軍政皆中官專之終左領軍衛大將軍贈陝

州大都督子耆別傳

烏承玼字德潤張掖人開元中與族兄承恩皆為平盧  
先鋒號轅門二龍契丹可突干殺其王邵固降突厥而  
奚亦亂其王魯蘇契族屬及邵固妻子自歸是歲奚契  
丹入寇詔承玼擊之破于捺祿山二十二年詔信安王  
祿率幽州長史趙含章進討承玼請含章曰二寇固劇  
賊前日戰而北非畏我乃誘我也公宜蓄銳以折其謀  
含章不信戰白城果大敗承玼獨按隊出其右斬首萬

計可突于奔北奚渤海犬武藝與弟門藝戰國中門藝  
來詔與太僕卿金思蘭發范陽新羅兵十萬討之無功  
武藝遣客刺門藝於東都引兵至馬都山屠城邑承玘  
室要路塹以大石更四百里敵不得入於是流民得還  
士少休脫鎧而耕歲省度支運錢安慶緒使史思明守  
范陽思明恃兵彊為自固計慶緒密遣阿史那承慶安  
守忠就督事且圖之承玘勸思明曰唐家中興與天下  
更始慶緒偷肆晷刻公殆與俱亡有如來身本朝湔洗

前汙此反掌功耳思明善之斬承慶等奉表聽命始承恩為冀州刺史失守思明護送東都故肅宗使自雲中趨幽州開說思明與承玘謀投釁殺之不克死承玘奔李光弼表為冠軍將軍封昌化郡王為右領軍使王思禮為節度使軍政倚辦焉久之移疾還京師卒年九十六子重胤別傳

郭子儀華州鄭人長七尺二寸以武舉異等補左衛長史累遷單于副都護振遠軍使天寶八載木剌山始築

橫塞軍及安北都護府詔即軍為使俄苦地偏不可耕  
徙築永清號天德軍又以使兼九原太守十四載安祿  
山反詔子儀為衛尉卿靈武郡太守充朔方節度使率  
本軍東討子儀收靜邊軍斬賊將周萬頃擊高秀巖河  
曲敗之遂收雲中馬邑開東陁加御史大夫賊陷常山  
河北郡縣皆沒會李光弼攻賊常山敗之子儀引軍下  
井陘與光弼合破賊史思明衆數萬平橐城南攻趙郡  
禽賊四千縱之斬偽守郭獻璆還常山思明以衆數萬

踵其後及行唐子儀選騎五百更出挑之三日賊引去  
乘之又破於沙河遂趨常陽以守祿山益出精兵佐思  
明子儀曰彼恃加兵必易我心不固矣與戰未決戮一  
部將以徇士殊死鬪遂破之斬首二千級俘五百人獲  
馬如之於是晝揚兵夜擣壘賊不得息乃與光弼僕固  
懷恩渾釋之陳回光等擊賊嘉山斬首四萬級獲人馬  
萬計思明跳奔博陵於是河北諸郡往往斬賊守迎王  
師方北圖范陽會哥舒翰敗天子入蜀太子即位靈武



詔班師子儀與光弼率步騎五萬赴行在時朝廷草昧  
衆單寡軍容闕然及是國威大振拜子儀兵部尚書同  
中書門下平章事仍總節度肅宗大閱六軍鼓而南至  
彭原宰相房琯自請討賊次陳濤斜師敗衆略盡故帝  
唯倚朔方軍為根本賊將阿思那從禮以同羅僕骨騎  
五千誘河曲九府六胡州部落數萬迫行在子儀以回  
紇首領葛邏支擊之執獲數萬牛羊不可勝計河曲平  
至德二載攻賊崔乾祐於潼關乾祐敗退保蒲津會永

樂尉趙復河東司戶參軍韓旻司士徐景及宗室子鋒  
在城中謀為內應子儀攻蒲復等斬陣者披闔內軍乾  
祐走安邑安邑偽納之兵半入縣門發乾祐得脫身走  
賊安守忠壁永豐倉子儀遣子旰與戰斬首萬級旰死  
于陳進收倉於是關陝始通按通鑑云安慶緒遣兵救潼關郭旰等大敗死者萬餘人李韶先王祚戰死僕固懷恩抱馬首浮度渭水退保河東據此則潼關既得復失觀旰等之死似通鑑為得之  
詔還鳳翔進司空充關內河東副元帥率師趨長安  
次蒲水上賊守忠等軍清渠左大戰王師不利委仗奔

子儀收潰卒保武功待罪於朝乃授尚書左僕射俄從  
元帥廣平王率蕃漢兵十五萬收長安李嗣業為前軍  
元帥為中軍子儀副之王思禮為後軍陣香積寺之北  
距澧水臨大川彌亘一舍賊李歸仁領勁騎挑戰官軍  
囂嗣業以長刀突出斬賊數十騎乃定回紇以奇兵繚  
賊背夾攻之斬首六萬級生禽二萬賊帥張通儒夜亡  
陝郡翼日王入京師老幼夾道呼曰不圖今日復見官  
軍王休士三日遂東安慶緒聞王師至遣嚴莊悉衆十

萬屯陝助通儒旌幟鉦鼓徑百餘里師至新店賊已陣  
出輕騎子儀遣二隊逐之又至倍以往皆不及賊營輒  
反最後賊以二百騎掩軍未戰走子儀悉軍追橫貫其  
營賊張兩翼包之官軍却嗣業率回紇從後擊飛矢射  
賊賊驚曰回紇至矣遂大敗僵死相屬於道嚴莊等走  
洛陽挾慶緒度河保相州遂收東都於是河東河西河  
南州縣悉平以功加司徒封代國公食邑千戶入朝帝  
遣具軍容迎灞上勞之曰國家再造卿力也子儀頓首

陳謝有詔還東都經略北討乾元元年破賊河上執安  
守忠以獻遂朝京師詔百官迎於長樂驛帝御望春樓  
待之進中書令帝即詔大舉九節度師討慶緒以子儀  
光弼皆元功難相臨攝第用魚朝恩為觀軍容宣慰使  
而不立帥子儀自杏園濟河圍衛州慶緒分其衆為三  
軍將戰子儀選善射三千士伏壁內誠曰須吾却賊必  
乘壘若等譟而射既戰偽遁賊薄營伏發注射如雨賊  
震駭王師整而奮斬首四萬級獲鎧冑數十萬執安慶

和收衛州又戰愁思岡破之連營進圍相州引漳水灌城漫二時不能破城中糧盡人相食慶緒求救於史思明思明自魏來李光弼王思禮許叔冀魯晁前軍遇之戰鄴南殺傷相半晁中流矢子儀督後軍未及戰會大風拔木遂晦跬步不能相物色於是王師南潰賊亦走輜械滿野諸節度引還子儀以朔方軍保河陽斷航橋時王師衆而無統進退相顧望責功不專是以及於敗有詔留守東都俄改東畿山南東道河南諸道行營元

帥魚朝恩素疾其功因是媒譖之故帝召子儀還更以趙王為天下兵馬元帥李光弼副之代子儀領朔方兵士卒涕泣遮中使請留子儀給之曰我餞中使耳未行也因躍馬而去

謹按通鑑輯覽

批李郭雖並為中興名將輸忠王室然朔方受代之際使子儀光弼易地而居恐光弼不能如子儀之略無芥蒂矣兩人優劣當以此定之思明再陷河洛西戎逼擾京輔天子旰食乃

授邠寧鄜坊兩節度使仍留京師議者謂子儀有社稷功而孽寇首鼠乃置散地非所宜帝亦悟上元初詔為

諸道兵馬都統以管崇嗣副之率英武威遠兵及河西河東鎮兵繇邠寧朔方大同橫野軍以趨范陽詔下為朝恩沮解明年光弼敗邛山失河陽又明年河中亂殺李國貞太原賊鄧景山朝廷憂二軍與賊合而少年新將望輕不可用遂以子儀為朔方河中北庭潞儀澤沁等州節度行營兼興平定國副元帥進封汾陽郡王屯絳州時帝已不豫羣臣莫有見者子儀請曰老臣受命將死於外不見陛下目不瞑帝引至卧內謂曰河東事



一以委卿子儀嗚咽流涕至屯誅首惡王元振等數十人諸鎮惕息代宗立程元振忌宿將難制離構百計因罷子儀副元帥加實戶七百為肅宗山陵使子儀懼讒且成盡哀肅宗所賜詔敕千餘篇上之因自明帝優詔答之初帝與子儀平兩京同天下憂患至是悔悟眷禮彌重時史朝義尚盜洛帝欲使副雍王率師東討為朝恩元振交訾之乃止會梁崇義據襄州叛僕固懷恩屯汾州陰召回紇吐蕃深入犯奉天武功遽拜子儀關內

副元帥鎮咸陽初子儀自相州罷歸京師部曲散縱逮承詔麾下才數十騎驅民馬補行隊至咸陽賊已過渭水並南山而東天子幸陝子儀聞流涕董行營還京師遇射生將王獻忠以穀騎叛劫諸王欲奔賊子儀讓之取諸王送行在乃率騎南收兵得武關防兵及潰卒數千軍寢完會六軍將張知節迎子儀洛南大閱兵屯商州威震關中乃遣知節率烏崇福羽林將長孫全緒為前鋒營韓公堆晝則擊鼓張旗幟夜則叢萬炬以疑賊

初光祿卿殷仲卿募兵藍田以勁騎選官軍為游奕直  
度滌民紿賊曰郭令公來賊懼會故將軍王甫結俠少  
夜鼓朱雀街呼曰王使至吐蕃夜潰於是遣大將李忠  
義屯苑中渭北節度使王仲昇守朝堂子儀以中軍繼  
之射生將王撫自署京兆尹亂京城子儀斬以徇破賊  
書聞帝以子儀為京城留守自變生倉卒賴子儀復安  
故天下皆咎程元振羣臣數論奏元振懼乃說帝都洛  
陽帝可其計子儀奏曰雍州古稱天府用武之國秦漢

所以成帝業也先帝興朔方誅慶緒陛下席西土戮朝  
義雖天道助順亦地勢則然比吐蕃馮陵而不能抗者  
蓋由六軍皆市井竄虛名逃實賦一日驅以就戰有百  
奔無一前又宦豎掩迷庶政荒奪遂令陛下彷徨暴露  
越在陝服斯委任失人豈秦地非良哉洛陽自大盜以  
來焚埃畧盡百曹榛荒褰服不滿千戶市邑如墟東薄  
鄭汴南界徐北綿懷衛及相千里蕭條亭舍不烟何以  
奉萬乘牲餽供百官次舍哉且地狹阨裁數百里險不

足防適為闖場惟時邁亟還見宗廟謁園陵再造王家  
以幸天下帝得奏曰子儀固社稷臣也朕西決矣乘輿  
還子儀頓首謝罪帝勞曰用卿晚故至此乃賜鐵券圖  
形凌烟閣僕固懷恩縱兵略并汾屬縣帝患之以子儀  
兼河東副元帥河中節度使鎮河中懷恩子瑒屯榆次  
為帳下張惟岳所殺傳首京師持其衆歸子儀懷恩懼  
委其母走靈州廣德二年進太尉兼領北道邠寧涇原  
河西通和吐蕃及朔方招撫觀察使辭太尉不拜懷恩

誘吐蕃回紇党項數十萬入寇朝廷大恐詔子儀屯奉  
天帝問計所出對曰無能為也懷恩本臣偏將雖慄果  
然素失士心今能為亂者誅思歸之人劫與俱來且皆  
臣故部曲素以恩信結之彼忍以刃相向乎帝曰善賊  
寇邠州先驅至奉天諸將請擊之子儀曰客深入利速  
戰彼下素德我吾緩之當自攜貳因下令敢言戰者斬  
堅壁待之賊果遁子儀至自涇陽思賚崇縉進拜尚書  
令懇辭不聽詔趣詣省視事子儀固讓且言太宗嘗踐

此官故累聖曠不置員皇太子為雍王定閩東乃得授  
渠可猥私老臣且用兵以來僭賞者多至身兼數官冒  
進亡恥今凶醜略平乃作法審官之時宜從老臣始帝  
不獲已許之具所以讓付史官因賜美人六人從者自  
副車服帷帟咸具永泰元年詔都統河南道節度行營  
復鎮河中懷恩盡說吐蕃回紇党項羌渾奴刺等三十  
萬掠涇邠躡鳳翔入醴泉奉天京師大震於是帝命李  
忠臣屯渭橋李光進屯雲陽馬璘郝廷玉屯便橋駱奉

先李日越屯盤屋李抱玉屯鳳翔周智光屯同州杜冕  
屯坊州天子自將屯苑中急召子儀屯涇陽軍纔萬人  
比到賊騎圍已合乃使李國臣高昇魏楚玉陳回光朱  
元琮各當一面身自率鎧騎二千出入陣中回紇怪問  
是謂誰報曰郭令公驚曰令公存乎懷恩言天可汗棄  
天下令公即世中國無主故我從以來公今存天可汗  
存乎報曰天子萬壽回紇悟曰彼欺我予子儀使諭賊  
曰昔回紇涉萬里勦大憝助復二京我與若等休戚同



之今乃棄舊好助叛臣一何愚彼背主棄親於回紇何  
有回紇曰本謂公亡不然何以至此今誠存我得見乎  
子儀將出左右諫以賊不可信子儀曰今衆寡不敵難  
以力勝吾將示以至誠左右請以騎五百從又不聽即  
傳呼曰令公來賊皆持滿待子儀以數騎出免胄釋甲  
投鎗而進諸酋長大驚相顧曰是也皆下馬羅拜子儀  
即召與飲遺錦綵結歡誓好如初因說之曰吐蕃不顧  
舅甥之親吞噬我邊鄙焚蕩我畿甸所掠之財不可勝

計馬牛被數百里是謂天賜不可失且逐戎得利與我  
繼好不兩善乎會懷恩暴死羣賊無所統一遂許諾吐  
蕃疑之夜引去子儀遣將白元光合回紇衆追躡大軍  
繼之破吐蕃十萬於靈臺西原斬級五萬俘萬人盡得  
所掠士女牛羊馬橐駝不勝計遂自涇陽來朝加實封  
二百戶還河中大厯元年華州節度使周智光謀叛帝  
間道以蠟書賜子儀令悉軍討之同華將吏聞軍起殺  
智光傳首闕下二年吐蕃寇涇州詔移屯涇陽邀戰於

靈州敗之斬首二萬級明年還河中吐蕃復寇靈武詔  
率師五萬屯奉天白元光破賊於靈武議者以吐蕃數  
為盜馬磷孤軍在邠不能支乃以子儀兼邠寧慶節度  
使屯邠州徙磷為涇原節度使回紇赤心請市馬萬匹  
有司以財乏止市千匹子儀曰回紇有大功宜答其意  
中原須馬臣請內一歲奉佐馬直詔不聽人許其忠九  
年入朝對延英帝與語吐蕃方彊慷慨至流涕退上書  
曰朔方國北門西禦犬戎北虞獫狁五城相去三千里

開元天寶中戰士十萬馬三萬匹僅支一隅自先帝受命靈武戰士從陛下征討無寧歲頃以懷恩亂疲傷彫耗亡三分之二比天寶中止十之一今吐蕃兼吞河隴襍羗渾之衆歲深入畿郊勢踰十倍與之角勝豈易得邪屬者賊來稱四節度將別萬人入兼數馬臣所統士不當賊四之一馬不當賊百之二外畏內懼將何以安臣唯陛下制勝力非不足但簡練不至進退未一時淹師老地廣勢分願諸道料精卒滿五萬者列屯北邊則

制勝可必竊惟河南河北江淮大鎮數萬小者數千殫  
屈稟給未始蒐擇臣請追赴關中勒步隊示金鼓則攻  
必破守必全長久之策也又自陳衰老乞骸骨不許德  
宗嗣位詔還朝攝冢宰充山陵使賜號尚父進位太尉  
中書令增實封通前二千戶給糧千五百人留馬二百  
匹盡罷所領使及帥建中二年疾病帝遣舒王到第傳  
詔省問子儀不能興叩頭謝恩薨年八十五帝悼痛廢  
朝五日詔羣臣往弔隨喪所須皆取於官贈太師陪葬

建陵及葬帝御安福門哭過其喪百官陪位流涕賜諡忠武配饗代宗廟庭著令一品墳崇丈八尺詔特增丈以表元功子儀事上誠御下恕賞罰必信遭幸臣程元振魚朝恩短毀方時多虞握兵處外然詔至即日就道無纖介顧望故讒間不行破吐蕃靈州而朝恩使人發其父墓盜未得子儀自涇陽來朝中外懼有變及入見帝唁之即號泣曰臣久主兵不能禁約軍士殘人之墓固已多矣此天譴非人患也朝恩又嘗約子儀修具元

載使人告以軍容將不利公其下衷甲願從子儀不聽  
但以家僮十數往朝恩曰何車騎之寡告以所聞朝恩  
泣曰非公長者得毋致疑乎田承嗣傲狠不軌子儀嘗  
遣使至魏承嗣西望拜指其膝謂使者曰茲膝不屈於  
人久矣今為公拜李靈耀據汴州公私財賦一皆遏絕  
子儀封幣道其境莫敢留令持兵衛送麾下宿將數十  
皆王侯貴重子儀頤指進退若部曲然幕府六十餘人  
後皆為將相顯官其取士得才類如此與李光弼齊名

而寬厚得人過之子儀歲入官俸無慮二十四萬緡前後賜良田美器名園甲館不勝紀代宗不名呼為大臣以身為天下安危者二十年校中書令考二十四八子七壻皆貴顯朝廷諸孫數十不能盡識至問安但頷之而已富貴壽考哀榮終始人臣之道無闕焉子曜盱眙眊晤曖曙眈而四子以才顯

曜性沈靜資貌瑰傑累從節度府辟署破賊有功為開陽府果毅都尉至德初推子儀功授衛尉卿累進太子



詹事太原郡公子儀專征伐曜留治家事少長無間言  
諸弟或飾池館盛車服曜獨以朴簡自處子儀罷兵遷  
太子少保昆弟六人共制拜官子儀薨以遺命簿上四  
朝所賜名馬珍物德宗復賜之乃悉散諸弟居喪以禮  
疾甚或勸茹蔥薤終不屬口後盧杞秉政忌勲族子儀  
壻太僕卿趙縱少府少監李洞清光祿卿王宰皆以次  
得罪姦人幸其危多論奪田宅奴婢曜大恐獨宰相張  
鎰力保護德宗稍聞之詔有司曰尚父有大功於國許

宥十世前日其家市田宅奴婢而無賴者以尚父歿妄  
論奪之自今有司毋得受建中三年卒贈太子太傅諡  
曰孝

晞善騎射從征伐有功復兩京戰最力出奇兵破賊累  
進鴻臚卿河中軍亂子儀召首惡誅之其支黨猶反仄  
晞選精兵晝夜警以備非常姦人不得發以功拜殿中  
監吐蕃回紇入寇加御史中丞領朔方軍援邠州與馬  
璘合軍擊賊破之賊復來陣涇水北子儀遣晞率步兵

五千騎五百製賊晞以兵寡不進須暮賊半濟乃擊斬  
首五千級加御史大夫子儀固讓乃止居父喪值朱泚  
亂南走山谷賊昇致之欲汙以官佯瘖不答賊露兵脅  
之不動數以城中事貽書李晟既而奔奉天天子還改  
太子賓客子綱從朔方杜希全幕府希全檄為豐州刺  
史晞憐其弱不任事丐罷德宗遣使者召綱綱疑得罪  
挺身走吐蕃不納希全執送京師賜死晞坐免尋復太  
子賓客累封趙國公卒贈兵部尚書孫承嘏

承嘏字復卿幼秀異通五經元和中及進士第累遷起居舍人居母喪以孝聞太和六年為諫議大夫言政事得失文宗以鄭注為太僕卿承嘏極論其非注頗懼進給事中俄出為華州刺史給事中盧載還詔書且言承嘏數封駁稱職宜在禁闥帝曰朕謂久次欲優其稍入耳乃復留給事中時江淮旱用度不支詔宰相分領度支戶部承嘏言宰相調陰陽安黎庶若使閱簿書校緡帛非所宜帝順納遷刑部侍郎帝常稱其儒素無貴驕

氣不類勲家每進對恩接備厚方大任用會卒家無餘  
貲親友為辦喪祭贈吏部尚書

曖以太常主簿尚昇平公主拜駙馬都尉試殿中監封  
清源縣侯寵冠戚里大厯末檢校左散騎常侍建中時  
主坐事留禁中朱泚亂逼署曖官辭以居喪被疾既而  
與公主奔奉天德宗嘉之釋主罪進曖金紫光祿大夫  
賜實封五千戶尋遷太常卿貞元三年襲代國公卒年  
四十八贈尚書左僕射初曖女為廣陵郡王妃王即位

是為憲宗妃生穆宗穆宗立尊妃為皇太后贈暖太傅  
四子鑄釧鍛鈷鑄襲封

釧代宗朝以外孫為奉禮郎累官至左金吾大將軍改  
檢校工部尚書為邠寧節度使入為司農卿憲宗寢疾  
宦豎或妄議廢立者穆宗問計於釧答曰殿下為太子  
當旦夕視膳何外慮乎時稱得元舅體穆宗即位檢校  
戶部尚書兼司農卿俄為河陽三城節度使徙河中尹  
領進絳慈隰節度使敬宗立召拜兵部尚書又帥劍南

東川太和中南蠻寇蜀取成都外郛杜元穎不能禦詔  
劉兼領西川節度未行蠻衆已略梓州州兵寡不可用  
詔貽書譙蠻首差巔以侵叛意差巔曰元穎不自守數  
侵吾圉我以是報乃與劉修好約無相犯天子嘉之即  
拜西川節度使以疾請代為太常卿卒贈司徒子仲文  
仲泰仲詞開成二年詔仲文襲太原郡公給事中盧弘  
宣奏劉妻沈公主女代宗皇帝外孫其子仲詞尚饒陽  
公主仲文冒嫡不應襲使仲文承嫡則沈當黜且仲詞

亦不得尚主乃詔仲詞檢校殿中少監駙馬都尉襲封而仲文以太皇太后故置不問仲恭厯詹事府丞亦尚金堂公主

鍤字利用尚德陽郡主順宗立主進封漢陽公主擢鍤檢校國子祭酒駙馬都尉自景龍後外戚多為檢校官不治事宰相薦其才不當以外戚廢乃拜右金吾將軍封太原郡公恭遜折節不以富貴加人性周畏不立赫赫名有諫於上退必毀橐家人子弟無知者別墅在都



南尤勝壇穆宗嘗幸之置酒極歡改太子詹事充閑廐  
宮苑使卒贈尚書左僕射

鉅性和易累為殿中監尚西河公主鉞卒累為太子詹  
事宮苑閑廐使長慶三年暴卒初西河主降沈氏生一  
子鉅無嗣以沈氏子嗣

曙代宗朝累官司農卿德宗幸奉天曙方領家兵獵苑  
北聞蹕至伏謁道左遂從乘輿入駱谷霖雨塗潦衛兵  
或異語帝召謂曰朕不德而苦公等宜執朕送朱泚以

謝天下諸將皆感泣曰願死生從陛下時曙與功臣子  
李昇韋清令狐建李彥輔被甲請見言曰南行路險且  
虞姦變臣等世蒙恩今相誓願更挾帝馬許之帝還曙  
清擢金吾大將軍餘並為禁軍將軍曙終祁國公

子儀母弟幼明性謹愿喜賓客以子儀故終少府監贈  
太子太傅子昕肅宗末為四鎮留後闕隴陷不得歸朝  
廷但命官遙領其使建中二年昕始與伊西北廷節度  
使曹令忠遣使入朝德宗下詔褒獎忠授北廷大都護

四鎮節度留後賜氏李更名元忠所授安西大都護四  
鎮節度使諸將吏超七資叙官云

欽定續通志卷二百三十八